



CONVOCATORIA DE ELEIÇÕES **ILUSTRE COLEXIO PROVINCIAL DA AVOGACÍA** **DE LUGO**

A Xunta de Goberno deste Ilustre Colexio Provincial da Avogacía, en sesión celebrada o día 21 de setembro do 2026, de conformidade co previsto no artigo 79 do Estatuto Xeral da Avogacía Española e artigo 75 e seguintes dos Estatutos Colexiais (EC), adoptou o acordo de convocatoria de eleccións, que **terán lugar o próximo día 30 de novembro do 2026**, para a provisión dos cargos vacantes da Xunta de Goberno que a continuación se relacionan, por expiración do seu mandato:

Deputado/a Terceiro/a
Tesoureiro/a

CANDIDATURAS.-(artigo 77 EC) As candidaturas deberán ser presentadas na Secretaría deste Ilustre Colexio (Pascual Veiga nº 2) diante da Mesa Eleitoral, con, polo menos, un mes de antelación á data sinalada para o acto eleitoral, sendo **o último día de presentación o venres, día 30 de outubro do 2026**, ata o peche das oficinas colexiais, ás 14.30 horas.

Estas candidaturas poderán ser conxuntas, para varios (neste caso os dous) cargos, ou individuais para cargos determinados, debendo ser subscritas polos/as propios/as candidatos/as. Ningún/ha colexiado/a poderá presentarse candidato/a a máis dun cargo dos que teñan que ser elixidos na mesma convocatoria.

A Mesa Eleitoral, dentro dos tres días seguintes á finalización do prazo de presentación de candidaturas, proclamará candidatos/as a quenes reúnan os requisitos legais esixibéis, declarando electos/as aos que non teñan opoñentes.

A relación dos proclamados/as notificarase aos candidatos/as, e será exposta no taboleiro de anuncios da Corporación, na páxina web colexial, e comunicarse por correo electrónico aos colexiados/as.

Coa presentación da candidatura recoñécese a cada candidato/a o dereito para obter, da Xunta de Goberno, unha listaxe de colexiados/as coas súas direccións e teléfonos profesionais.



COLEXIADOS/AS ELECTORES E ELIXIBLES. - (artigo 75 EC) Nas eleccións poderán participar **como electores** todos/as os/as colexiados/as cunha antigüidade de máis de seis meses de incorporación á data da convocatoria, que, á devandita data, non se atopen cumprindo unha sanción disciplinaria e esteñan ao corrente das súas obrigas colexiais.

Poderán participar, **como elixibles**, as persoas integrantes do Colexio que sexan profesionais da avogacía exercentes residentes dentro do ámbito territorial do Colexio.

En todo caso, non poderán estar incursos ou incursas en ningunha das seguintes situacións á data de peche do prazo para a presentación de candidaturas:

- a) Os condenados ou condenadas por sentenza firme que leve aparellada a inhabilitación ou suspensión para cargos públicos en tanto estas subsistan.
- b) Ser disciplinariamente sancionados ou sancionadas en calquera Colexio da avogacía mentres non fosen rehabilitados ou rehabilitadas. Para estes efectos, solicitarase a colaboración do Consello Xeral da Avogacía para comprobar que non concorre esta causa de inelixibilidade.
- c) Ser integrantes de órganos reitores doutro Colexio profesional.
- d) Non estar ao corrente do pago das cotas colexiais.

Os/as membros da Xunta de Goberno serán elixidos/as en votación directa e secreta entre os do Colexio nos termos e condicións que establecen os Estatutos. Non se permitirá a delegación de voto. Nas eleccións, o voto dos/as exercentes e dos rexistrados terá o dobre valor que o voto dos/as non exercentes.

Os colexiados e colexiadas que quixesen formular reclamacións contra as listas de electores deberán verificalo dentro do prazo dos dez días seguintes á exposición destas.

MESA ELEITORAL.- (artigo 78 EC) A Mesa Eleitoral estará formada por 5 membros, e regulará o desenvolvemento do proceso sen prexuízo das atribucións que os Estatutos outorgan á propia Xunta. Estará constituída por dous/duas membros da Xunta de Goberno cuíos cargos non sexan obxecto de renovación nesa convocatoria eleitoral, así como un/ha anterior membro que pertencese á Xunta de Goberno, e polo avogado/a residente de maior idade e polo de menor antigüidade no exercicio profesional, os cales serán



substituídos/as no caso- de incapacidade, incompatibilidade ou imposibilidade- polo seguinte en antigüidade, respectivamente.

Serán competencias da Mesa Eleitoral tódalas incidencias que afecten ao proceso electoral, dende o momento da presentación das candidaturas ata o momento da proclamación dos elixidos.

VOTO POR CORREO. – (artigo 80 EC) Unha vez que finalice o prazo de candidaturas, e se proclamen os/as candidatos/as, tódolos/as colexiados/as que o desexen poderán exercer o voto por correo. Para iso será imprescindible que o colexiado ou colexiada solicite previamente o impreso que lle recoñeza o carácter de votante por correo. A solicitude deberá facerse persoalmente mediante escrito dirixido por correo electrónico á Xunta de Goberno, confirmado pola Secretaría do Colexio, coa signatura, en todo caso, do/a interesado/a e a acreditación da súa identidade mediante achega inescusable de fotocopia ou reprodución de DNI por ambas as caras.

O impreso que autoriza o voto por correo será enviado ao/á solicitante, acompañado dun sobre numerado no que inescusablemente terá que remitir o voto por correo, así como as papeletas de votación editadas polo Colexio e o sobre que terá que conter o voto.

Dentro do sobre numerado, que deberá ser remitido ao Colexio por correo certificado con acuse de recibo ou ser recollido presencialmente na sede colexial, o/a votante introducirá o impreso de autorización de voto, referido no apartado anterior, xunto co sobre no que, para garantir o segredo do voto, deberá ir introducida a papeleta.

Este voto entregado presencialmente ou remitido por correo certificado con acuse de recibo na Sede Colexial, **terá que ter a súa entrada antes das 19.30 horas do día 23 de novembro do 2026.**

DESENVOLVEMENTO DA VOTACIÓN.- (artigo 81 EC) A celebración do acto electoral terá lugar na sede sita na Rúa Pascual Veiga, 2 baixo. Este acto **comezará ás 10.00 horas e continuará ata as 19.00 horas do día sinalado** na convocatoria; hora, esta última, na que se pecharán as urnas e iniciárase o escrutinio de votos.

Os colexiados e colexiadas que concorran ao acto electoral, deberán acudir provistos do carné corporativo ou, na súa falta, de calquera outro documento acreditativo da súa identidade, a fin de que, pola Mesa Eleitoral, se poida verificar a súa inclusión no censo.



Existirán dúas furnas, unha para os letrados/as exercentes e outra para os colexiados/as non exercentes. O voto dos letrados exercentes terá o dobre de valor que o dos non exercentes.

PUBLICIDADE DA CONVOCATORIA.- Esta convocatoria, do mesmo xeito que a lista de electores, estará exposta, no taboleiro de anuncios das dependencias colexiais nos Xulgados, circularase por correo electrónico a todos/as os/as colexiados/as e inserirase na páxina web colexial.

O que teño a honra de comunicar a Vd. co carácter de convocatoria para as expresadas eleccións.

En Lugo, ao 29 de setembro do 2026.

V.Bº DO DECANO

XOSÉ MANUEL FERNÁNDEZ VARELA

O SECRETARIO

ANTONIO SÁNCHEZ MAGARIÑOS